


www.BibleForChildren.org



Jon 14



Kini Yesu rini-pən tuk əriə mə, “Rikimiə tukripəh nəmheyen. Shatətə ye Kughen, mīshatətə mīn irak. Ye nimə kape Tatə kafak, kwənmhaan ripsaah. To rīpipəh norien məknakin, to yawəni-əsaah pre ta iran tuk əmiə. Taktakun ai, yakamvən aikin tuk nor-əpnəpənəyən ye kwənmhaan kapəmiə.”




“Meinai jakvən mor apnəpeinə ta ye kwənmhaan
kapəmiə, kini mirerig-pə mīn mīkīr əmiə, khavən
mīsarə kitawə-m kīmiə, mə kīmiə takasarə aikīn
yakamarə ikīn.”



Yo Jon, yo piaumiə kirik meinai kitawə m-fam
kwənhauə kirikianə kitawə Yesu. Kini nipig
nəmhəyen ramuə tuk ətawə meinai


Yesu ramarmaru irətawə,
kitawə kamhavəh



kwermıtawə kirikianə,
nərigien kapətawə
rəpomh, kasərer
skai.




Kimnəṛəhu-pən yo ye kwaji tanə e Patmos, meinai
yakamni-ərhav nəgkiarien yame Kughen
ravəhsi-pə, kini mamərer-ərhav tuk Yesu.



Məkneikin, nəsaninien kape Nanmin Rhakə rimnor
kimi yo. Yakwaag kupən, məm King ramkwətə ye jea
kafan, mamarmaru ye rao ye neai.




Məkneikin, yimnərig narimnar fam yame Kughen
rimnor ye rao ye neai, mine ye tanimtanə, mine ye
tame tahik, mine ye kwənmhaan
kape nimhəyen, mine narimnar
fam yame kamhaswin irəriə, iriə
m-fam kamhani mhamə, . . .




. . . “Pəh nini-vi-vi-yen mine nisiaiyen ramvən tuk King
yame ramkwətə-pən ye jea, mine tuk Kwaji Sipsip,
meinai In ravəh nikhakien mine
narmaruyen. !Pəh nini-vi-vi-yen
mine nəsaninien ramvən tuk əriu,
mivən, mivən, mivən, mipəh
norien infamien!”



Kini yakəm taon imorhakə kape Kughen, in e
Jerusalem Vi, ramsi-pən tuk Kughen ye rao ye neai,
meiwaiyu-pə. Kimnor-pən marə-marə kafan rəmhen
kin piroavin yame kamor-pən kafan marə-marə kimin
mə tukarkurək kapəriu.




Kini ai yakərig riki yermamə kirik rokrən apomh
misi-pən tuk jea kape king mamni mimə, “!Səmru!
Taktəkun ai, Kughen rinor rukwanu kafan yerki
narmamə. In tukrarə iriə miriə. Kini iriə tukhauə kafan
narmamə minə. Kughen In atuaturə tukrarə iriə min.
In kapəriə
Kughen.”



Agelo rimnhajoun ta taon vi kimi yo, kini mamhajoun
min nu miragh kin yo yame ramaiyu. Rəmtir rəmtir
rəmhen kin glas. Mamsi-pən tuk jea kape Kughen
mine Kwaji Sipsip.



Kini taon a rapəh nətəgtəyen ye mırh mine makuə,
meinai nikhakien kape Kughen raməsie fam aikin, kini
Kwaji Sipsip in laet kafan.



Məritg narimnar yamə mine kasəmkimik ye nimir
Kughen, mine narmamə yamə mine kasor nar yame
ror naurisien, mine nəmə eikuə
minə, iriə e to khapəh
nisauru-pəniən ye taon a.
Narmamə əmə yamə
mine kimirai-pən ta
nhagriə ye Nəkwəkwə
kape Nimiraghien yame
Kwaji Sipsip ramrəh,
iriə əmə e kharkun
nisauru-pəniən aikin.



“In tukr̄irai ta nehe n̄imr̄iriə
fam. N̄imh̄øyen r̄irkək aik̄in a;
m̄ine nasəkien tuk n̄imh̄øyen.
Nar kupən m̄inə e, iriə
kwənharkək ta, tukhapəh
nhauə-m̄inien.”




Kini Kughen to ripəh min norien narpinien. Kughen mine Kwaji Sipsip kaokwətə ye jea kape King mawarmaru aikin a. Kini kafan yorwok minə kasəhuak kimin. Tuksem nimrin. Kini kirai-pən nhagin ye nupanairiə.



Kini ai yakəm narmamə yamə mine kwənhamhə ta,
nəmehuə minə mine narmamə apnapig minə. Iriə
kasərer kupən ye jea kape King. Məkneikin kəvi
nəkwəkwə minə tiksın. Kini kəvi min nəkwəkwə kirik,
in e Nəkwəkwə kape Nimraghien. Tukəm
nəkirien kape narmamə yamə mine
kwənhamhə ta ye nəkwəkwə a.

Kaməkir əmhen əriə kirikianə
kirikianə tuk nar yame
kimisor. Narmamə
yamə mine kipəh
nəmien nhagriə ye
Nəkwəkwə kape
Nimraghien, tukarko-pən
kin əriə ye nəkwai nap ehue a.



Nanmin kape Kughen, iriu piraovin kape Kwaji Sipsip
kirəni mirəmə, “!Hauə!” Kini pəh narmamə yamə mine
kasərig nəgkiarien e khamə, “!Hauə!” Tukmə yermamə
rəkwakwə, pəh ruə. Tukmə yermamə rorkeikei, pəh ruə
minim Nu Miragh mipəh nivəhyen nimrin.



Ror məkneikin meinai Kughen rorkeikei
narmamə m-fam ye tanımtanə mher-pə
kin Yo, Tini kwənkwan kirikiane əmə,
mə narmamə yamə mine kashatətə
irak, tukhapəh nhamhəyen, mərig
tukhavəh nımraghien rerin.



Rom 3:23

meinai narmamə m-fam kasor təvhagə hah, kini masəvi-əkiə ye swatuk kape natuatukien kape Kughen yame rhuvə makhak.

Rom 6:23

Ror məknakin meinai nərokien kape təvhagə hah in nimhəyen; məriḡ nar yame Kughen ravəhsi-pə apnapig əmə kimi ətawə, in e nimraghien rerin yame ramsi-pən tuk Yesu Kristo Yermaru kapətawə.

Hibrus 9:27

Kitawə narmamə, Kughen rimnərəhu nipig yame narmamə kirikianə kirikianə tukhamhə iran, kini tukhamhə mikirikianə əmə. Kini kwasig ikin, In tukrəkir kapətawə norien minə.



Efesas 2:8,9

Meinai nihuvəyen kape Kughen in swatuk yame Kughen ravəh miragh əmiə iran, meinai nakashatətə iran. Pəh nien mə kimie atuk nimisor swatuk mə Kughen tukrivəh miragh əmiə- Kughen pisin əmə ravəh miragh narmamə, nərokien rikək iran. Pəh nien mə wok kirik yame narmamə kasor, tamə kisausit tukun.

Rom 10:9,10

mimə tukmə nakhani-ərhav ye nhermie mhamə Yesu in Yermaru, kini tukmə nakshatətə əfrakis yerkimie mfam mə Kughen rimivəh miragh Yesu ye nimhəyen kafan, kini Kughen tukrivəh miragh əmiə. Ror məkneikin meinai Kughen ramor narmamə kisatuatuk ye nimrin nipig kishatətə əfrakis iran yerkirie. Kini Kughen ravəh miragh narmamə nipig irie kamhanti-ərhav ye nherie mhamə Yesu in Yermaru.



Jon 3:16,17

Ror məkneikin meinai Kughen rorkeikei narmamə m-fam ye tanımtanə mher-pə kin Yo, Tini kwənkwan kirikianə əmə, mə narmamə yamə mine kashatətə irak, tukhapəh nhamhəyen, mərig tukhavəh nımraghien rerin. Pəh nien mə Kughen rımnher-pə kin Yo Tini mə jakuə mivəhsi-pən narpınien kimi narmamə. Mərig rımnher-pə kin mə Yo jakuə mor swatuk tuk nivəh-mıraghien narmamə ye tanımtanə.

1 Jon 5:11-13

In e nəgkiarien yame Kughen ramni-ərhav, mə Kughen rivəhsi-pə nımraghien rerin kimi ətawə, kini nımraghien e, kivəh tuk Tini. Narmamə yamə mine kamhavəh Ji Kughen yerkirie, irie kamhavəh nımraghien. Mərig narmamə yamə mine khapəh nhavəhyen Ji Kughen yerkirie, khapəh nhavəhyen nımraghien. Yakamrai nəgkiarien minə e kimi əmie yamə mine nakshatətə ye nhag Ji Kughen, mə kimie takharkun huvə mə nakwənhavəh ta nımraghien rerin.



Jon 14; 2 Korin 5; Revelesen 4, 21, 22

Storyline by: Edward D. Hughes

Illustrated by: Lazarus
and Alastair Paterson

Adapted by: Sarah S.

Tanna Southwest NT (nwi) © 2012, Wycliffe Bible
Translators, Inc. All rights reserved.

<https://www.bible.com/bible/485/MAT.1>

©2026 Bible for Children, Inc.

www.M1914.org

www.bibleforchildren.org

